



La revue *Aleph. langues, médias et sociétés* est approuvée par ERIHPLUS. Elle est classée à la catégorie B.

Tazrawt tasnirmant n yisental n yikayaden n lbak n Uylif Ayelnaw n Usegmi n tmurt n Lezzayer : tasleqt n yirman uzzigen n yisental n teqbaylit d tcawit

دراسة مصطلحية لمواضيع امتحانات البكالوريا وزارة التربية الوطنية الجزائرية: تحليل المصطلحات الخاصة المستعملة في مواضيع القبائلي والشاوية.

Etude terminologique des sujets d'examen du baccalauréat du Ministère Algérien de l'Education Nationale : analyse des termes spécialisés utilisés dans les sujets du kabyle et du chaouia

Terminological study of the baccalaureate examination subjects of the Algerian Ministry of National Education: analysis of the specialized terms used in the examination subjects of the Kabyle and Chaouia languages

ABDELAZIZ BERKAI, YOUDA DJOUADI ET KHOUDIR OUCHER - M.Tahar-BEJAIA

ASJP	Soumission	Publication numérique	Publication Asjp
Algerian Scientific Journal Platform	01-02- 2022	31-03-2023	25-09-2023

Éditeur : Edile (Edition et diffusion de l'écrit scientifique)

Dépôt légal : 6109-2014

Edition numérique : <https://aleph.edinum.org>

Date de publication : 31 mars 2023

ISSN : 2437-1076

(Edition ASJP) : <https://www.asjp.cerist.dz/en/PresentationRevue/226>

Date de publication : 25 septembre 2023

Pagination : 383-402

ISSN : 2437-0274

Référence électronique

Berkai Abdelaziz, Djouadi Youva et Ouicher Khoudir, « Tazrawt tasnirmant n yisental n yikayaden n lbak n Uylif Ayelnaw n Usegmi n tmurt n Lezzayer : tasleqt n yirman uzzigen n yisental n teqbaylit d tcawit», Aleph [En ligne]. 2023. URL : <https://aleph.edinum.org/8182>

Référence papier

Berkai Abdelaziz, Djouadi Youva et Ouicher Khoudir, « Tazrawt tasnirmant n yisental n yikayaden n lbak n Uylif Ayelnaw n Usegmi n tmurt n Lezzayer : tasleqt n yirman uzzigen n yisental n teqbaylit d tcawit», Aleph, 10 (4-1) | 2023, pp. 383-402.

Tazrawt tasnirmant n yisental n yikayaden n lbak n Uylif Ayelnaw n Usegmi n tmurt n Lezzayer : tasleđt n yirman uzzigen n yisental n teqbaylit d tcawit

دراسة مصطلحية لمواضيع امتحانات البكالوريا لوزارة التربية الوطنية الجزائرية : تحليل المصطلحات الخاصة المستعملة في مواضيع القبائliche والشاوية.

Etude terminologique des sujets d'examen du baccalaureat du Ministère Algérien de l'Education Nationale : analyse des termes spécialisés utilisés dans les sujets du kabyle et du chaouia

Terminological study of the baccalaureate examination subjects of the Algerian Ministry of National Education: analysis of the specialized terms used in the examination subjects of the Kabyle and Chaouia languages

ABDELAZIZ BERKAI, YOUVA DJOUADI ET KHOUDIR OUCHER

ABDERRAHMANE MIRA -UNIVERSITÉ DE BEJAIA

Tazwart

Segmi i tekcem tmaziyt yer uyerbaz azzayri deg useggas n 1995, seld mi d-yella wayen i wumi qqaren "ayunzu n ukertabl" deg useggas ayurbiz 1994/1995, d nettat teqqim kan akken ur d-yettilli ara usseddi-ines deg yikayaden unsiben n taggara n useggas. Aselmed n tmaziyt, deg tazwara-s, yella-d s lmendar n yiselmaden ur nesei ara asiley uzzig – ney agerdas – deg tutlayt tamaziyt. Dya, yas akken win yekkren ad yuval d aselmad n tutlayt-a – ula d imaswađen ara yessilyen iselmaden xuşşen1 –, ulac atas n yiselmaden rnu drus n yinelmaden i tt-yeqqaren. Deg tallit-a, aselmad n tmaziyt yegra-d d yinelmaden-is deg tzeqqa sdat n waṭas n wuguren, garasen : ugur n tesniremt tuzzigt.

Deg useggas n 2008, mi d-yella ubeddel deg wahil n usegmi syur imdebbren n tmurt n Lezzayer, yettwasuddes-d i tikkelt tamenzut ukayad n lbak s tutlayt tamaziyt yef tanga n uselmed n tutlayt n tmaziyt. Sya i d-yeqqel lewhi yer tesniremt ara yettusxedmen i uselmed d wamek i ilaq ad tili gar yiselmaden d yinelmaden i yerza uselmed d ulmad n tmaziyt s tmaziyt. S wawalen-nniđen, qrib tura 30 d aseggas segmi i tebda tirmit n uselmed n

1. Deg Bgayet, armi d aseggas n 2013 i d-yella umaswad i yesean asiley deg tayult n tmaziyt. Zik, d amaswad n tutlayt tafransîf i yetṭfen lecyal n usenṣeb n yiselmaden n tmaziyt.

tutlayt tamaziyt, qrib 15 d aseggas segmi i tekcem yer ukayad n lbak, wissen amek i tga, ass-a, tutlayt tuzzigt n uselmed n tmaziyt ? D tiririt yef usteqsi-ya i d aybel n tezrawt-a

Deg ubrid n unadi yef tririt, nerfed tiki n userwes gar yirman uzzigen n sin yimcalayen n tmaziyt: taqbaylit d tcawit. Akken nezra, asentel n ukayad n lbak n tmaziyt yettili-d s 3 n yimcalayen: taqbaylit, tacawit d tmahaq. Ar deeqkal, s uxeddimm-a-nney, ad nnadi yef usuffey n tmuyl tamatut yef tutlayt tuzzigt i yettuseqdacen deg yisental n sin yimcalayen-nni imezwura akken ad nzer amhaz-is d wamek i tedda yer zdat.

Tazrawt-a ihi tebda yef sin n yixfawen: tiżri d usnas. Deg yixef amezwaru, ad d-nawi awal yef waddayen n teżri n tesniremt d terrayin-is; ad d-neglem day tisnirmin tisnetlanin, i ilan assay d uselmed n tutlayt, i d-yeffyen s tmaziyt. Deg yixef wis sin, ad nekcem yer tesleqt tasnirmant n yirman uzzigen i d-nugem seg yisental n yikayaden n lbak seg useggas n 2008 ar 2021.

1. Tizriyin d yiberdan ussnanen n tesniremt

Send ad nekcem yer wul n tezrawt-a-nney ara d-yilin d aserwes gar yirman n teqbaylit d wid n tcawit, i yettusqedcen i usebbed n yisteqsiyen n yisental n yikayaden n lbak – i d-yettunefken i yinelmaden n useggas wis 3 n tesnawit gar yiseggasen n 2008 d 2021 –, yewwi-d fell-ay ad d-nawi awal, s tewzel, yef kra n waddayen n teżri i yef tres tesniremt; yef yiverbazen-is i yemgaraden deg tmuylwin d terrayin n usnas; ad newwet ad d-nesbadu d acu i d irem. Dya, d ayen ara d-nesken deg uzwel-a amezwaru ara d-yinin yef waniwa ajgu n teżri, deg wayen i yerzan tayult n tesniremt s wudem amatu, i nessers tikiwin-nney.

Segmi i d-tlul tussna n yirman, s unamek-is atrar, deg useggas n 1930 – s tezrawt n ddukuura i yellu Wüster (Rondeau, 1984: 6) – yer wass-a, tedda-d abrid yezzifen, ama deg waddayen-is n teżri; deg terrayin-is n usnas; deg yiswan i yer tettnadi ad tawed, atg. Ad newwet ad d-nemmeslay, s tewzel, yef yineggura-ya akken ad nzer ma yella ad nizmir ad nessiwed ad d-naf anida ara nessers tasniremt tamaziyt.

Deg wayen i yerzan addayen n teżri, Humbley (1994: 161) yemmeslay-d yef sin n yiverbazen igejdanen n tesniremt i yemgaraden deg tmuyl, deg kra n tlufa i yerzan tiżri d usnas: ayerbaz n Vienne mgal ayerbaz n Prague d Québec. Akken ad d-yessegzi tamgirda i yellan gar sin n yiverbazen-a, yebder-d Humbley (1994: 160) tasleqt i yexdem Laurén. Yur-s tasniremt n uyerbaz n Vienne d tussna i wumi fkan udem agtayulan, imi tasnilest d yiwt n tussna gar tussniwin-nniđen – ney d afurek gar yifurkan – i yellan deg

tesniremt. Yur-s dayen, tasniremt n Wüster d wid i tt-ye_{II}afaren, yur-s yiwt n tmuylı tagraylant, imi iswi-s d asmagnu n wayen i d-snulfuyen ijenyuren deg tayulin-nsen, i usifses n teywalt tussnant gar-asen, anida i byun ilin deg uma_{II}al. Ma yella yer uyerbaz n Prague d Québec, tasniremt d amur seg wamuren i tla tesnilest, rnu d tayelnawti. Iswi n tesniremt n uyerbaz n Québec d asmagnu utlayan n tef_{II}ansist deg Canada; iswi n tesniremt n win n Prague d asmagnu n tutlayt tačikit i wakken ad tizmir i tayulin tatrarin n tussna; ad d-tekkes amkan-is gar tutlayin-nni_{II}en.

Cabré (1998: 37-39) seg tama-s, s usenned n tektil-s yef wayen i yexdem Auger, teb_{II}a tarrayin i yettuseqdacen deg tayult n tesniremt yef 3 n yiberdan igejdanen i tta_{II}afen yimazzagen n tussna-ya. Yur-s, tarrayt tamezwarut, i wumi tsemmma tarrayt tasnilsant-tasnirmant, te_{II}afar ti_{II}ri n Wüster. Iswi-s d asmagnu n tnaktiwin d yirman i usifses n teywalt tussnant gar yimassanen n kra n tayult tuzzigt. Tarrayt tis snat, i wumi tsemmma, tasniremt n usuqqel, tennerna deg tmura i deg llan yimsiwal n tef_{II}ansist. Iswi-s d asebbed n yigdazalen s tutlayt B i yirman i d-yennulfan s tutlayt A. Tarrayt taneggarut, i wumi tsemmma tarrayt n useggem utlayan, tlul-d seg yisenfareni d-ssulint kra n tmura, am Québec, i usnerni n kra n tutlayt tadersant i yemrent tutlayin-nni_{II}en tineyamarin deg wakal-is.

Deg yiseggasen-a ineggura, ddeqs n yimnadiyen, deg tayult n tesniremt, i d-yewwten deg tarrayin n tesniremt n Wüster, i yettwalin irman d tayunin ur nesei ara imegdawalen – ma nra ad d-nebder ala attwel-a – s usebbed n tarrayin d tmuylıwin timaynutin i tesniremt. Gar yimassanen i d-yefkan tineggura-ya, nezmer ad d-nebder Rousseau (2013: 45-59) d Cabré (2013: 133-168), deg yimagraden i d-uran deg udlis amegru *Dans tous les sens du terme* i d-yeffyen ddaw ufus n Quirion, Depecker d Rousseau: tasnirmettit n Gaudin, tasnirmettit tamusnant n Temerman, tamuylı taywalant n tesniremt i d-teglem Cabré d tesniremt tadelant n Diki-Kidiri.

Seg tama n yimnadiyen n tesniremt tamazi_{II}t, yemmeslay-d Amaoui (2015: 322-336) yef waddad i deg tella tesniremt tamazi_{II}t, d waniwa abrid n tesnarrayt i d-tewwi. Yur-s, d win n useggem utlayan d tsuqqilt i d-tewwi, yaş ur d-yekki ara seg yisudduyen unşiben n uwanek.

Tazrawt-nney, nekni, nesbedd-itt yef tarrayin-a n tesniremt:

- Tasniremt n useggem utlayan n uyerbaz n Québec: nra ad nwali ma yella ucali, ney ulac, gar yirman n teqbaylit d wid n tcawit;
- Tasnirmettit n Gaudin: nebya ad nwali aniwi irman i ye_{II}zan deg uselmed n tmazi_{II}t, s wudem amatu, ladya deg yikayaden n lbak;

- Tasniremt taywalant n Cabré: nra ad nwali s wanita tasniremt i d-tettilli teywalt gar wid i d-yessebdaden isental n yikayaden n lbak d yinelmaden i t-yeseeddayen.

2.Tisnirmin tisnetlanin i ilan assay d yisental n ukayad n lbak n tmaziyt

Awal ad yezzi, deg uzwel-a wis sin, yef yimawalen uzzigen – ney tisnirmin tisnetlanin – n tmaziyt i yesean assay d usentel n umagrad-a-nney. Asebbed n yisteqsiyen n yikayaden n lbak n tmaziyt, s yimcalayen n tmaziyt, yuser asexdem n tesnirmin n tayulin i yemgaraden i usuddes n yinaw ayefmeslay ara yegzu unelmad. Send ad nekcem yer tesleqt-nney, ara d-yilin deg uzwel wis 3, yewwi-d ad d-nesmekti, s tewzel, d acu i wumi neqqar tasniremt tasnetlant ; ad d-nebder dayen imawalen, i ilan assay d uselmed n tutlayt, i d-yeffyen s wallalen n usiżreg.

Ma neđfer tiki n Rondeau (1984 : 69), tasniremt tasnetlant d agraw n yirman uzzigen – ney d umuy n yirman i ilan tilisa – i tezdi yiwit n tayult, yiwit n ttiknikt, yiwit n tussna, yiwit n tżuri, atg. S tsuqqilt n wawalen s wacu i d-yeglem tasniremt tasnetlant d yiswi-s : « Iswi n tesniremt tasnetlant d asebbed n yirman akk yeqqnen yer yiwit n tayult, s timmad-nsen ma yella wamek (...), ama deg yiwit n tutlayt ney gar snat n tutlayin ney ugar. »

« La recherche terminologique thématique a pour but d'établir, de façon plus ou moins exhaustive (...), l'ensemble des termes (...) rattachés à un domaine (...), soit à l'intérieur d'une même langue, soit par rapport à deux ou plusieurs langues. »

Ur d-nettawi ara awal yef terrayin n usebbed n tesnirmin tisnetlanin i d-yeglem Rondeau (1984), ad needdi srid yer uglam, s talya tawezzllant, n tesnirmin tisnetlanin – i ilan assay d uselmed n tutlayt – i d-yeffyen, s wallal n usiżreg, s tmaziyt. Dya, yer tneggura-ya ara nesserwes irman i d-negmer, seg yisteqsiyen n yikayaden n lbak, deg uzwel wis 3.3 n tezrawt-nney akken ad nwali ma yella seg yimawalen-a uzzigen i d-ttwakksen yirman-nni ney ala.

1. Tajerrumt n tmaziyt n Mouloud Mammeri : Adlis amezwaru i ilan irman n yiwit n tayult tuzzigt d win i d-yessuffey Mouloud Mammeri yer taggara n yiseggasen n 1970 : *Tajerrumt n tmaziyt (Tantala taqbaylit)*² Deg-s, azal n 176 n yirman uzzigen i d-yettwasnulfan i uglam n tjerrumt n teqbaylit, s teqbaylit : 151 n yirman deg wumuñ-nni asintlay tamaziyt-tafřansist ; 13

2. Azwel-is s talya tummidit : *Tajerrumt n tmaziyt (tantala taqbaylit). Grammaire berbère (kabyle).*

n yirman deg ulyu ; 12 n yirman deg uđris (Achab, 2014 : 17). Deg tezrawt i yexdem Amaoui i udlis-a amezwaru i d-yewwin yef tjerřumt n tmaziyt s teqbaylit – ma nekkes win i d-yessuffey Saïd Hanouz deg useggas n 1968 (Amaoui, 2015) – yessuffey-d 299 n yirman uzzigen i yettwasqedcen deg wayen i wumi isemma, s ubdar n Rey-Debove, « amawal ayefmeslayan ». Ma yella d ayen i yerzan « tasniremt n tjerřumt » s timmad-is, yufa-d 239 n yirman (Amaoui, 2021 : 88).

2. Amawal n tmaziyt tatrart³ n Mouloud Mammeri : Amawal n tmaziyt tatrart d tasniremt i d-yessebbed Mouloud Mammeri, d kra n yimnadiyen-nniđen, gar yiseggasan n 1972 d 1974 (Achab, 2013 : 116). Deg-s azal n 1941 (Ibid. : 127) n yiwalnuten i d-yettunefken d igdazalen i yirman n tutlayt tafřansist. Akken i d-yenna Amaoui (2015 : 325), amawal n tmaziyt tatrart d adlis i deg llant ddeqs n tayulin i yemgaraden, gar-asent : tafizikt, tasensertit, tusnakt, tajerřumt, atg. Yas ur yelli ara d tasniremt tasnetlant am tiyad, yeqqim umawal-a d azamul, deg wayen i yerzan tarrayin n usebbed n yirman, i yiqeddicen i d-yeffyen deffir-s.
 3. Amawal n tesnilest⁴ n Abdelaziz Berkaï : Adlis-a n yirman uzzigen i d-yeffyen yer teřigin Achab deg useggas n 2009 d umuy n taynunin tisnirmanin i yerzan tayult n tesnilest. Deg-s nnig n 2000 n yirman i yegdan deg wazal asnamkan s tlata n tutlayin i yemgaraden : tafřansist, taneglizit d tmaziyt. Yessawed umeskar n tesniremt-a tasnetlant ad d-yesnulfu agdazal, s tmaziyt, i yal irem i d-yennulfan s tutlayt tafřansist s usexdem n kra n terrayin n tesnulfawalt i yellan d timaynutin i tutlayt n tmaziyt. Tineggura-ya, yeglem-itent-id s telqey deg sin n yimgraden i d-yura yef ccyel-a (żr. Berkaï, 2007, 2011, Bounfour et al., 2009 : 33-52).
 4. Amawal n tjeřumt⁵ n Usudu Ageldan n Yîdles Amaziy (IRCAM) (ddaw n ufus n Boumalk d Nait-Zerrad) : Amawal n tjeřumt d

3. Azwel-is s talya tummidt : *Amawal n tmaziyt tatart* (*Lexique de berbère moderne*) : *Tamaziyt-Tafransîṣ* ; *Tafransîṣ-Tamaziyt*.

⁴ Azwel-is s talya tummidi : *Lexique de la linguistique Français-Anglais-Tamazight : précédé d'un essai de typologie des procédés néologiques*. Yeffey-d i tikkelt tamezwarut yer tezrigin L'Harmattan n Fransa deg useggas n 2007. Ieawed-as-d asufey Achab di Lezzayer (Tizi Wezzu) deg useggas n 2009.

5. Azwel-is s talya tummidt : **أَنْوَلِيزْ تَالِيَا تُمْمِدْت** - Amawal n tjerumt - Vocabulaire grammatical : Français-Amazighe-Anglais-Arabe ; Amazighe-Français-Anglais-Arabe.

adlis i d-yessazreg Usudu Ageldan n Yidles Amazi⁶ deg tmurt n Merṭuk, deg useggas n 2009. Asebed n tesniremt-a d lyella n tdukli gar yimnadiyen n Usudu Ayelnaw n Tutlayin d Tyermiwin n Usammar⁷ akked wid n Usudu Ageldan n Yidles Amazi. Deg-s 352 n yirman uzzigen n tayult tanjeṛrumt i d-sbedden s rebea n tutlayin yemgaraden : tafransist, tamaziyt, taneglizit, taerabt (Boumalk & Naït-Zerrad (ddaw n ufus n.), 2009 : 12).

5. Asegzawal amezzyan n tsekla n Mohand Akli Salhi : Adlis-a aseknirman i d-yessuffey Mohand Akli Salhi deg useggas n 2009 – d useggas 2017 i tikkelt tis snat – d tasniremt tasnetlant n tayult n tsekla. Deg-s, « 938 » n yirman uzzigen i wumi yessebbed tibadutin tiseknawalin i usegzi-nsen d usbadu-nsen (Salhi, 2012 : 117). Akken i t-id-yenna netta yakan deg umagrad i d-yura yef terrayin i yessexdem deg usali n tesniremt-a (Salhi, 2010 : 169). Iswi-s d asnulfu n yirman i uselmed n tsekla tamaziyt, seg uyerbaz alemmas yer tesdawit. Deg tezrawt-a-nney, ad nesseqdec imagraden i d-yura Salhi yef yirman n tsekla (żr. Salhi, 2010a ; 2010b, 2012).
6. Amawal n tesnalmudt d tussniwin n umeslay n Mohand Mahrazi : Tasniremt-a tasintlayt n Mohand Mahrazi tla 1600 n yirman uzzigen i d-yewwin yef tayult n tesnalmudt d tussniwin n umeslay s wudem amatu, s snat n tutlayin : tafransist d tmaziyt. Deg tezwart n udlis-a (Mahrazi, 2013 : 7), yebder-d, umeskar-is, tadyulin i yer ttekkin yirman i d-yesnulfa, gar-asent : tamsiselt-tasnimeslit, tasnawalt, tasnamka, tasnilesmetti, atg.
7. Asegzawal amezzyan n tesnilest n Azedine Idir, Mehdi Yahiaoui d Nacer Mehdi : Adlis-a aseknirman yerza irman n tayult n tesnilest. Ineggura-ya, d wid i sseqdacen yiselmaden n tesnilest, n tesdawit n Bgayet, deg ukala n taywalt i d-yettelin gar-asen d yinelmaden-nsen. Deg tesniremt-a, llan 90 n yirman uzzigen i d-yettwasnulfan i usemmi n tnaktiyin tisnilsanin n tadyulin-a am unagraw n umyag d yisem, tasnamka, taseknawalt, atg., s tikci n tbadutin-nsent. Akken i t-id-uran deg tezwart n usegzawal-a (IYM, 2020 : 16), adlis-a n yirman rnu-t yer win i d-yessuffey Mohand Akli Salhi (żr. Azwel wis 2.5) i tayult n tsekla.

6. Institut royal de la culture amazighe (IRCAM).

7. Institut National des Langues et Civilisations Orientales (INALCO).


8. D amdan n yirman i d-yefka deg umagrad-is.

3. Tasleqt tasnirmant n tayunin tinmawalin n yisental n lbak n tmaziyt

Deg uzwel-a, ad newwet ad nesled irman i yettusqedcen deg yisteqsiyen i d-ttaken, wid i d-yessebdaden isental-nni, i yinelmaden n tmaziyt deg ukayad n lbak, yal aseggas, seg 2008 ar 2021. Deg tesleqt-a tasnirmant, ad d-nessuffey irman – ney iremnuten – i yettusexdamen deg usebbed n yisteqsiyen i d-yettawin yef tutlayt n tmaziyt. Dya, yelha ma nesmekta-t-id, tayessa n usentel n ukayad n tmaziyt deg lbak am tin n yisental n tutlayin-nniđen. Deg-s 3 n yiswiren i yef d-ttilin yisteqsiyen : isteqsiyen yef uđris, isteqsiyen yef tjerřumt n tutlayt d yisteqsiyen yef ufares n kra n uđris. Deg uheyyi n tesleqt-nney, nekka-d yef yisental n lbak, yiwen yiwen ; awal awal, akken ad neeqel yal irem uzzig i yettusxedmen deg usatal n tikci n yisteqsiyen i yinelmaden n useggas wis 3 n tesnawit.

S usiđen d tesleqt i nexdem i yal asentel i d-yeffyen seg useggas n 2008 ar 2021, nufa-d ttusqedcen 326 n yirman deg usentel n teqbaylit d 323 n yirman deg usentel n tcawit. Amđan-a i d-nessuffey d umuy amatu n yirman i yettusxedmen deg yal tazrigt n lbak – yal tazrigt deg-s sin n yisental. Deg wumuy-a amatu, nsedda-d irman i d-yettuyalen yal aseggas – dacu kan ur d-nseddi ara irman i d-yettuyalen deg yisental n yiwen n tezrigt – akken ad nesled, ad nektazel acali d usmeskel gar teqbaylit d tcawit, d wamek i iga (żr. Azwel 3.1) ; ad nwali dayen anowi irman i yezzan deg usatal n uselmed n tmaziyt d waniwi ur yeddin ara atas (żr. Azwel 3.2). Lħasun, mi nekkes irman i d-yettuyalen deg wumuy-nni amezwaru n 326 n yirman deg tama n teqbaylit d 323 n yirman deg tama n tcawit, deg yal tazrigt, nessawed ad d-nessuffey 115 n tayunin tisniranin deg yisental n lbak n ulqem (?) n tutlayt taqbaylit ; 112 n yirman deg yisental n ulqem n tutlayt tacawit. Irman-a, ama deg teqbaylit ney deg tcawit, tħafaren 3 n tayulin tigejdanin : tajerřumt (tasnilest) (51 %) ; tasekla (28 %) ; tasnalmutd (15 %) (żr. Azenziy 1).

Azenziy 1



3.1. Aserwes gar yirman n ukayad n teqbaylit d win n tcawit

Deg tazwara, akken i d-nesken deg uzwel i yezrin, mi i d-nessuffey irman i yettusqedcen deg yisental n yal tameslayt, nufa-d agmuḍ n tayunin tisnirmanin i yemgaraden : 112 n yirman deg tcawit d 115 n yirman deg teqbaylit. Tamgirda-ya tamezwarut tesban-d llan yirman – 3 n yirman – n teqbaylit i wumi ur d-fkin ara igdazalen s tcawit (żr. Tafelwit 1). Nnig n waya, mi nesled umuy-nni n 326 n yirman, nufa-d 294 seg-sen i deg ulac acali gar teqbaylit d tcawit : d irman i yettusqedcen deg teqbaylit i yettusqedcen deg tcawit. Seg tama-nniđen, nessawed ad d-naf 3 n yiswiren-nniđen – 4 n taggayin n ucali ma nerna tin i d-nebder deg tseddart-a ufella – i deg yella ucali gar yirman n teqbaylit d wid n tcawit. Iswiren-nni n ucali, nsemma-yasen s tesniremt-a :

- Acali asnirman (6 n yirman) (żr. Tafelwit 2) ;
- Acali deg tirawalt (5 n yirman) (żr. Tafelwit 3) ;
- Asemres n tmegdawalt i usegzi n yirem i yettusqedcen (7 n yirman) (żr. Tafelwit 4).

Tafelwit 1^{ut} : irman ur nli ara igdazalen deg tcawit

Irem s teqbaylit	Irem s tcawit	Tayult n yirem	Tazrigt n lbak
Taluft	/	Tasekla	2012
Isegran n tefyirt	/	Tajerṛumt	2013
Tiwuriwin n wawalen	/	Tajerṛumt	2012, 2015

Awennet n tfelwit 1^{ut}

Deg taggayt-a tamezwarut, nessers irman i wumi ur d-nufi ara igdazalen deg tcawit. S wawalen-nniđen, wid i d-ixedmen isental n yikayaden, sxedmen tarrayt i yemgaraden deg lebni n usteqli s tcawit :

- Uduš asnirman « Isegran n tefyirt » yettuseqdec tikkelt kan deg usentel n teqbaylit, deg teżrigt n 2013. Deg tcawit, fkan-d agdazal-is s tukksa n Isegran i usifses n usteqli.
- Irem « Taluft » ur yesesi ara agdazal deg tcawit, deg usentel n lbak n teżrigt n 2012. Deg teżrigin n 2010, 2011, 2012, 2014, 2016, 2019, 2020 d 2021 yesea agdazal.
- Uduš asnirman « Tiwuriwin n wawalen » yettuseqdec deg usentel n teqbaylit, deg teżrigin n 2012 d 2015. Deg tcawit ulac agdazal-is.

Tafelwit tis 2 : acali asnirman gar teqbaylit d tcawit

Irem s teqbaylit	Irem s tcawit	Tayult n yirem	Tazrigt n lbak
Aknaw	Iken	Tajerrumt	2010
Tinawt	Inaw	Tasnilest/ Tasekla	2010
Tizza n wullis	Ullis	Tasekla	2010
Irwasen	Akniwen	Tajerrumt	2011
Unti	Tawtemt	Tajerrumt	2014
Ađris amullis	Ađris ullis	Tasekla	2021

Awennet n tfelwit tis 2

Deg taggayt-a tis snat, nessers-d irman i yettbeddilen seg usentel aqbayli yer usentel acawi. S wawalen-nniđen, wid i d-yessebdaden isteqsiyen n yikayaden n lbak, ssexdamen irman i yemgaraden, gar teqbaylit d tcawit, akken ad d-inin yiwen n tyawsa :

- Irem « Ađris amullis » yettuseqdec deg tezrigt n 2021, deg usentel n teqbaylit kan. Wama deg tezrigin i yezrin d tayunt « Ađris ullis » i yettusmersen ama deg teqbaylit, ama deg tcawit. Ma nra ad d-nessegzi amaynut i yellan deg yirem-a d wamek i d-yedra s yiwen n tefyirt : d asiley n urbib seg urbib s tmerna n uskim « am- » yef uskim « u-i ».
- Irem « Aknaw » ila ddeqs n yirman-nniđen i yettusexdamen deg umkan-is, gar-asen : « Iken, Arwas » (zr. tafelwit tis 4).
- Irem « Tinawt » yettusexdem s talya n umalay deg tezrigt n 2010 deg tcawit. Deg tezrigin-nniđen d talya n wunti i yettusqedcen ama deg teqbaylit, ama deg tcawit.
- Uduš asnirman « Tizza n wullis » yettuseqdec tikkelt kan deg tezrigt n 2010. Deg tiyađ, d irem « Ullis » i yetfən amkan-is.
- Tamgirda i yellan gar yirman « Unti » d « Tawtemt » tedra-d tikkelt kan deg tezrigt n 2014. Syin d afella, d irem « Unti » i yettuseqdacen ama deg tcawit, ama deg teqbaylit.

Tafelwit tis 3 : acali deg tirawalt gar yirman n teqbaylit d tcawit

Irem s teqbaylit	Irem s tcawit	Tayult n yirem	Tazrigt n lbak
Taseddart tis snat	Taseddart tis sent	Tasekla/ Tasnalmudt	2010
Udem wis sin	Udem wis sen	Tajerrumt	2016
Taseddart tis ukuzzet	Taseddart tis ukuzzt	Tasekla/ Tasnalmudt	2016
Ssiley	Siley	Tajerrumt	2019
Taseddart tis ukuž	Taseddart tis ukuzzet	Tasekla/ Tasnalmudt	2019

Awennet n tfelwit tis 3

Deg taggayt-a tis tlata, nra ad d-nesbin tamgirda i d-yettisin deg wayen i yerzan tirawalt. Akken i t-id-nessers deg tfelwit-a ufella, llan kra n yirman i yettwarun s tira i yemgaraden :

- Tussda n « S » n ussway deg tira n yirem « Ssiley » deg teqbaylit ; tuksa n tussda n « S » n ussway deg tira-s s tcawit.
- Deg wayen i yerzan imđanen imaginuyen, yella umgired deg wayen i yerzan tira ama gar teqbaylit d tcawit, ama deg teqbaylit yakan seg tezrigt yer tayed ; ama deg tcawit yakan seg tezrigt yer tayed. Seg tama-nniđen, deg tira n twilawin « Tis » d « Wis » ulac amgired.

Tafelwit tis 4 : asemres n tmegdawalt i usegzi n yirem i yettusqedcen

Irem s teqbaylit	Amegdawal-is	Irem s tcawit	Amegdawal-is	Tayult n yirem	Tazrigt n lbak
Agensay	Asad	Agensay	/	Tasekla	2012
Arwas	Aknaw	Aknaw	/	Tajerřumt	2012
Aknaw	Arwas	Aknaw	/	Tajerřumt	2013
Tisyunin	Tasyunt	Tisyunin	Tasyunt	Tajerřumt	2014
Ales	/	Ales	Hki	Tasekla	2015
Isem n umeskar	Isem n umigaw	Isem n umeskar	/	Tajerřumt	2017
Aktawal	Iger n umawal	Aktawal	/	Tajerřumt	2013, 2017

Awennet n tfelwit tis 4

Deg taggayt-a tis rebea, nra ad d-nesken tarrayt i ssexdamen, wid i d-yessebdaden isteqsiyen n yikayaden n lbak n tmaziđt i usegzi n kra n yirem s yirem-nniđen. Aneggaru-ya ggaren-t gar tacciwin. Tixxamin-nni i nesbey s yini awray deg tfelwit-a ufella, d irman-nni s i d-ssegzayen irman-nni imezwura ama deg teqbaylit, ama deg tcawit.

- Irem « Agensay » yettwasegza-d s yirem « Asad » deg teqbaylit. Deg tcawit, ur d-yettwasegzi ara s yirem-nniđen. Asexdem n yirem « Asad » i usegzi n yirem « Agensay » deg umedya-ya ur d-yelli ara s wassay n tmegdawalt. Ahat, sxedmen irem « Asad » i usmekti n unelmad yef unamek n yirem « Agensay » imi deg yiwen n üzettaasnaktan i llan.

- Irem « Aknaw » yettwasegza-d s yirem « Arwas » deg teqbaylit. Deg tcawit, ur d-yettwasegzi ara s yirem-nniđen.
- Irem « Aktawal » yettwasegza-d s wudus asnirman « Iger n umawal » deg teqbaylit. Deg tcawit, ur d-yettwasegzi ara s yirem-nniđen.
- Irem « Ales » ur d-yettwasegzi ara s yirem-nniđen deg teqbaylit. Deg tcawit, yettwasegza-d s wawal amagnu « Ḥki ».
- Irem « Arwas » yettwasegza-d s yirem « Aknaw » deg teqbaylit. Deg tcawit, ur d-yettwasegzi ara s yirem-nniđen.
- Uduš asnirman « Isem n umeskar » yettwasegza-d s wudus asnirman « Isem n umigaw » deg teqbaylit. Deg tcawit, ur d-yettwasegzi ara s yirem-nniđen.
- Irem « Tisyunin » yettunefk-d s talya n usget, yiwen n tikkelt kan, yettwasegza-d s umđan asuf « Tasyunt ». Dya, ur d-yelli ara ucali asnirman s useqdec n tmegdawalt, d aseqdec n talya-nniđen n yirem-nni yakan i d-yellan.


3.2. Irman uzzigen i yezzan deg yisental n yikayaden n lbak

Deg uħriċ-a, ad yezzi wawal yef yirman i yuyen amkan deg yisental n yikayaden n lbak, ama deg win n teqbaylit, ama deg win n tcawit. Akken i d-nenna yakan, tasleđt-nney terza akk ikayaden n tmaziyt i d-yeffyen seg useggas n 2008 ar 2021. Ihi, nnig n ugħmuđ i d-nufa deg wayen i yerzan acali i yellan gar yirman n teqbaylit d wid n tcawit, tura ad newwet ad d-nessuffey irman i deg ulac acali d usmeskel ; irman i yettusxedmen s waħas ; irman uzzigen i yezzan deg usatal n tikci n yisteqsiyen.

Tarrayt i nedfer deg tezrawt-a, deg ukala n usiđen d uktili n yirman i d-yettuyalen s waħas, am tin i sseqdacen yimnadiyen n tayult n tektamawalt. Dya, nesseqdec yiwen n wallal umđin n uktili n yirman i wumi semman TermoStat9 Akken i d-nenna yakan, amđan n yirman i d-nekked deg teqbaylit d tcawit yemgarad : 326 n yirman deg teqbaylit, 322 n yirman deg tcawit. Deg tesleđt-a, nger yer useyzan TermoStat irman-nni n teqbaylit iman-nsen, akken i nexdem dayen i wid n tcawit i wakken ad d-naf asnagar n yirman i yal tutlayt. Ver tagħġara, seg tama n teqbaylit nufa-d 9 n yirman i d-yuyalen nnig n 9 n tikkal seg useggas n 2008 ar aseggas n 2021 (żr. azenziy wis 2 d tfelwit tis 5). Seg tama n tcawit, nufa-d 9 n yirman i d-yuyalen nnig n 9 n tikkal seg useggas 2008 ar aseggas n 2021 (żr. azenziy wis 3 d tfelwit tis 6).

9. TermoStat Web 3.0 : <http://termostat.ling.umontreal.ca/index.php> (nekcem yur-s ass n 20/08/2021)

Azenziy 2



Azenziy 3



Tafelwity %		Tafelwit 6	
Irem	Amdan n tuyalin	Irem	Amdan n tuyalin
Tigzi n uđris	15	Tigzi n uđris	15
Tafyirt	14	Tafyirt	14
Sled	14	Sled	14
Tadyant	12	Tadyant	12
Isumar n tefyirt	12	Isumar n tefyirt	12
Isestanen	12	Isestanen	12
Tasyunt	10	Tasyunt	10
Tinawt	9	Tinawt	9
Afares s tira	9	Afares s tira	9

Ama deg yisental n teqbaylit ama deg wid n tcawit, d udus asnirman « Tigzi n uđris » i yettusxedmen s waṭas. Dya, yuyal-d deg tezrigin n lbak akken ma llant. Ar deqqal, ḥaca deg usentel wis sin i d-yettunefken deg 2021 i yettuseqdec wudus asnirman-nniđen i usemmi n tnakti-ya : « Tigzi n tirawt ».

- Irem « Sled » i d irem wis sin i d-yuvalen s waṭas deg yisental n teqbaylit d tcawit. Anagar deg tezrigit n 2010 i ulac-it.

- Irem « Tafyirt » ur d-yuyal ara deg lbak n 2010. Dya, d talya-s n usget « Tifyar » i yettusqedcen.
- Irem « Tadyant » ur d-yuyal ara deg lbak n 2008, 2013 d 2018.
- Udus asnirman « Isumar n tefyirt » ulac-it deg 3 n tezrigin : tin n 2010 ; deg tin n 2011 ; deg tin n 2013 d udus asnirman « Isegran n tefyirt » i yettuseqdacen deg umkan-is.
- Irem « Isestanen » yuval-d 12 n tikkal. Ur yettwaseqdec ara deg 2008, 2009 d 2018. Deg 2018, d irem « Tuttriwin » i d-rran deg umkan-is.
- Irem « Tinawt » ur d-yuyal ara deg lbak n 2008, 2009, 2013, 2018 d 2019. Acu kan, deg usentel n tcawit n useggas n 2010 d talya-s n umalay i yettusqedcen kan.
- Irem « Tasyunt » ur d-yuyal ara deg lbak n 2008, 2009, 2011, 2012 d 2016.
- Udus asnirman « Afares s tira » ur yettuseqdacen deg 6 n tezrigin timezwura n lbak : 2008, 2009, 2010, 2011, 2012, 2013. D udus asnirman « Asenfali s tira » i yellan deg umkan-is.

3.3. Irman yettuseqdacen deg Ibak vs. irman n tesnirmin tisnet-lanin

Send ad nfak tasleqt-nney d uktli i nga i yirman uzzigen i ssexdamen yiselmaden d yimaswađen deg yisental n lbak i ttakken i yinelmaden yal aseggas, yewwi-d fell-ay ad ten-nesserwes – yirman-nni – d yirman i d-snulfan yimazzagen n tesnilest. Ineggura-ya, d tisnirmin-nni tisnetlanin i d-neglem deg uħric wis 2 n umagrad-a. Imi d awezyi ad nexdem aserwes i yal irem i d-nekkes, yewwi-d fell-ay ad nefren irman-nni kan i d-yettuyalen s waṭas. Ineggura-ya, ad asen-d-nefk igdazalen-nsen, i d-snulfan yimusnirmen, akken ad nwali ma yella umgired gar yirman i sseqdacen yiselmaden d yimaswađen n uyerbaz agejdan d yirman i d-snulfan yiselmaden d yimnadiyen n tesdawit (żr. tafelwit tis 7).

Tafelwit 7

Asage m	MSSM	MSB	MJBZ	JM	MMT	SMSI W	SMS S	Agdazal s teffansist
Tigzi n uđris	Tigzi [n] tirawt (sb.30, 233)	Tigzi [n wayen i] yuran (sb.74, 87)	/	/	Tigzi [n] uđris (sb.78, 128)	/	/	Compréhe nsion de l’écrit (texte ?)

Sled	Tasleqt (sb.255)	Tasleqt (sb.60)	/	/	Sled (sb.46)	/	Tasleqt (sb.124)	Analyse
Isumar n tefyirt	Tisumar [n] tefyirt (sb.88,147)	Isumar [n] tefyirt (sb.142,136)	Tisumar ar [n] twines t (sb.50,96)	Isumar [n] twines t (sb.10,11)	Isumar [n] twines t (sb.29,57)	/	/	Propositions de phrase
Isestan en	Isteqsiy en (sb.90)	/	Iseqsit en (sb.51)	/	Tutri win (sb.118)	/	/	Questions
Tafyirt	Tafyirt (sb.147)	Tafyirt (sb.136)	Tawin est (sb.96)	Tawin est (sb.11)	Tawin est (sb.57)	/	Tafyirt (sb.91,123)	Phrase
Tinawt	Timenn a (sb.44)	Tinawt (sb.89)	Tinayt (sb.32)	/	Inaw (sb.85)	/	Ini (sb.123)	Enoncé
Tasyu nt	Tasyunt (sb.224)	Tasyun t (sb.75)	Tasyu nt (sb.27)	Tasyu nt (sb.11)	Tasyu nt (sb.79)	/	/	Conjonction
Aktaw al	Iger anmawa l (sb.27)	Urti amawa lan (sb.70,114)	Iger n umaw al (sb.25,39)	/	/	/	/	Champ lexical

Deg tfelwit-a, nesserwes gar 15 n yirman uzzigen i d-nekkes seg usagmenney d tesnirmin tisnetlanin i d-yeffyen s wallal n usizreg. Nesbey s yini ačimi, irman i deg ulac acali asnirman d temgirda deg tarrayt n usiley n yirem : gar yirman i d-snulfan yimusnirmen d wid i d-snulfan yiselmaden d yimaswađen akked wid i ixeddmene deg Uylif Ayelnaw n Usegmi n tmurt n Lezzayer. Deg 15 n yirman-a, anagar 6 n yirman i deg ur d-nufi ara acali mi i ten-nesserwes yer tesnirmin i nefren : sled, tasyunt, tanfalit, tutlayt, tawuri, amyag. Deg 9 n yirman-nniđen, yal tikkelt nettaf-d acali – ma ulac akkyä yettili yiwen n yirem-nniđen. Ma nra ad d-nefk yiwen n umeda kan : udus asnirman « Tigzi n uđris » deg yisental n yikayaden n lbak, agdazal-is deg tesnirmin tisnetlanin yettemgirid : « Tigzi [n] tirawt » ney « Tigzi [n] uđris » deg tesniremt n Mahrasi (2013) ; « Tigzi [n wayen i] yuran » d « Tigzi [n] uđris » deg tesniremt n Berkaï (2009), « Tigzi [n] uđris » ney « Tigzi [n] tirawt » deg umawal n tmaziyt tatrart (1980). Ar deqqal, asiley n wudusen-a isnirmanen syur-nney i d-yekka. Deg tesnirmin i d-nebder, yal irem nettaf-it d takcempt iman-is. Ahat daymi i tettilli temgirda mi ara ttusqedcen ula deg yikayaden n lbak ? Ahat yettbeddin wudus-nni asnirman elahsab n wudus aybalu i nra ad nerr ar tutlayt tanicant ?

Taggrayt

Deg tyuri talqayant n usagem i d-negmer, nufa-d igmađ i yezmer ad yakez ula d win yexđan i tawit n tesniremt. Deg tazwara, asekkil s tettwaru teqbaylit d win n tcawit yemgarad : taqbaylit s usekkil alatini ; tacawit s usekkil abjad-aerab – almi d aseggas n 2015 i teqqel tcawit tettwaru s usekkil alatini dayen. Deg wayen i yerzan acali d usmeskel deg tesniremt tuzzigt i yettwasqedcen, deg tezrigt tamezwarut n ukayad n lbak, i d-yeffyen deg useggas n 2008, ur d-nemmugger ara tamgirda gar yirman n teqbaylit d wid n tcawit. Sakin, deg tezrigt n 2009, nufa-d yiwen n temgirda kan : irem « iwudam » deg teqbaylit, « udawen » deg tcawit. Turda i nezmer ad d-nefk yef temsalt-a n ucali asnirman i ulac deg sin n yiseggasen imezwura n yisental n lbak, d akken wid i d-yessebdaden isental-nni ur llin ara d Icawiyen¹⁰ Dya, d iselmaden iqbayliyen i yessuqqlen isental-nni seg teqbaylit yer tcawit.

S umata ihi, deg yikayaden n yiseggasen imezwura n 2008 d 2009, ulac acali asnirman gar teqbaylit d tcawit. Syin d afella, seg useggas n 2010 armi d 2016, yebda-d ucali asnirman yettbin-d gar sin yimcalayen-a n tmaziyt. S wawalen-nniđen, yebda-d umhaz n tesniremt n uselmed n tmaziyt s ukeččum n yiremnuten am : suddem, talya taħerfit, asget, atg. Seg useggas n 2016 d

¹⁰> D išteqsiyen i nešteqsa, seg yimi yer tmezzuyt, wid i yellan yef uqerru n tesqamat n usewjed n yikayaden n lbak n tmaziyt.

asawen, tebda tesniremt i yettuseqdacen tetterkad, s unqas n ucali gar teqbaylit d tcawit, deg kra n yirman am : unti, tinawt, atg. Nwala dayen, deg wayen i yerzan iybula igejdanen seg wansi i d-ttwakksen yirman i yettwaseqdacen deg yikayaden n lbak, d amawal n tmaziyt tatrart d win n tjerumt akken i t-id-tenna Sabri (2018 : 52). Dacu kan, yettin-d, seg teswiet yer tayed, uxeddil n yimaşwađen n tmaziyt s usnulfu n yirman am : aktawal, amullis, atg.

Yeg taggara, nezmer ad d-nini tasniremt i yettuseqdacen deg yikayaden n lbak n teqbaylit d tcawit meħsub d yiwen. Yas llan kra n yirman i deg yella ucali, drus maqsi. Dacu kan, yessefk ad d-tettwasebbed tesniremt tunṣibt n uyerbaz d uselmed – ama s wallal n usiżreg, ama s wallal umdin – i deg ara ilin yirman uzzigen n uselmed n tjerumt, n tesnalmudt, n tsekla d wid n usedbel n tlufa n tneyrit d uyerbaz. S usebbed n tesniremt-a tunṣibt ara yifsus ukala n uselmed n tmaziyt ama i unelmad, i uselmad, i umaşwad, ney i yimawlan n unelmad d yimsiwal imagnuyen n tutlayt akken ma llan.

Umuu n yidlisen

Achab, R. (2012). « Une présentation de Tajerumt n tmaziyt (Grammaire berbère) (1976) de Mouloud Mammeri ». In *Timsal n Tamazight 4 : Actes du colloque de Ghardaïa Nov. 14*, pp. 16-32.

Amaoui, M. (2015). « Coup d’œil sur le développement de la terminologie dans le domaine berbère ». In *Studi Africanistici. Quaderni di Studi Berberi e Libico-berberi 4*, pp. 323-336.

Amaoui, M. (2021). « Tajerumt n tmaziyt de Mouloud Mammeri : terminologie grammaticale et métalangage ». In *Multilingua Volume : 9/ N° 1*, pp. 82-105.

Benramdane, M.-Z. (2010). *Iysan s teqbaylit. Vocabulaire kabyle de l'ostéologie et de l'orthopédie*. Alger : HCA.

Benramdane, M.-Z. (2012). *Amawal n wattanen. Lexique pratique de la pathologie*. Alger : HCA.

BERKAI, A. (2009). *Lexique de la linguistique Français-Anglais-Tamazight. Précédé d'un essai de typologie des procédés néologiques*. Tizi-Ouzou : Editions ACHAB.

Berkai, A. (2011). « Quels critères d'acceptabilité des néonymes et quels modes lexico et terminogéniques : le cas du tamazight (berbère), confronté à celui du français ». pp. 1-24. URL : <https://pdfcoffee.com/neologie-tamazight-pdf-free.html> (consulté le 20/12/2021)

Bouamara, K. (2008). *Issin (Asegzawal n teqbaylit s teqbaylit)*. Alger : HCA.

Boumalk, A., & NAÏT-ZERRAD, K. (coord.) (2009). *Vocabulaire grammatical amazigh*. Rabat : IRCAM.

Cabre, M.-T. (1998). *La terminologie : théorie, méthode et application*. Ottawa : Les Presses de l’Université d’Ottawa.

Cabre, M.-T. (2013). « Panorama des approches et des tendances de la terminologie aujourd’hui ». In J. QUIRION, & al, *Dans tous les sens du terme : Regards croisés sur la*

- terminologie*. Québec : Presses de l'Université d'Ottawa/ Office québécois de la langue française, pp. 133-168.
- Dallet, J.-M. (1982). *Dictionnaire Kabyle-Français (Parler Des At Mangellat)*. Paris : SE-LAF.
- Elmedlaoui, M. (1998). « Tajerrumt' de Mouloud Mammeri : lecture analytique ». In *Awal, Cahiers d'Etudes Berbères n° 18*, pp. 115-131.
- Humbley, J. (1994). « Écoles de terminologie : mythe ou réalité ? Les cas autrichien et québécois ». In P. MARTEL, & J. MAURAS, *Langues et sociétés en contact : mélanges offerts à Jean-Claude Corbeil*. Tubingen : Niemeyer, pp. 159-167.
- Idir, A., & al. (2020). *Asegzawal amezzyan n tesnilest n tmaziyt (Petit dictionnaire de linguistique amazighe)*. Béjaïa : Berri.
- L'homme, M.-C. (2004). *La terminologie : principes et techniques*. Québec : Les Presses de l'Université de Montréal.
- Mahrazi, M. (2011). *Dictionnaire d'électrotechnique (Français-Tamazight)*. Alger : HCA.
- Mahrazi, M. (2013). *Lexique de didactique et des sciences du langage (Français-Amazigh ; Amazigh-Français)*. Alger : HCA.
- Mammeri, M. (1976). *Tajerṛumt n tmaziyt (tantala taqbaylit)*. Grammaire berbère (kabye). Paris : Maspero.
- Mammeri, M. (1990). *Amawal n tmaziyt tatrart (Lexique de berbère moderne)*. Béjaïa : Azar.
- Quirion, J., & al. (2013). *Dans tous les sens du terme : Regards croisés sur la terminologie*. Québec : Presses de l'Université d'Ottawa/ Office québécois de la langue française.
- Rondeau, G. (1984). *Introduction à la terminologie*. Québec : Gaëtan Morin.
- Rousseau, L.-J. (2013). « Terminologie et médiation linguistique : un mariage de raison ». In J. QUIRION, & al, *Dans tous les sens du terme : Regards croisés sur la terminologie*. Québec : Presses de l'Université d'Ottawa/Office québécois de la langue française, pp. 45-59.
- Saad-Buzefran, S. (2005). *Amawal n tsenselkint. Lexique d'informatique (Français - Anglais - Berbère)*. Paris : L'Harmattan.
- Sabri, M. (2018). « L'apport de Tajerṛumt n tmaziyt de Mouloud Mammeri dans l'enseignement de la langue amazighe en Algérie ». In *Iles d'Imesli, Volume 10, Numéro 1*, pp. 43-53.
- Sabri, M., & IBRI, S. (2013). « La néologie dans les manuels de tamazight du moyen et du secondaire : tentative d'aménagement ou de purification ? ». In *Timsal n tamazight, Volume 5, Numéro 1*, pp. 45-59.
- Salhi, M.-A. (2010). « Proposition de quelques termes pour l'étude de la littérature en langue amazighe ». *Iles d'Imesli, Volume 2, Numéro 1*, pp. 307-323.
- Salhi, M.-A. (2010). « Terminologie littéraire en amazighe ». *Asinag, 4-5*, pp. 169-177.
- Salhi, M.-A. (2012). « La terminologie de la littérature en langue amazighe : compte rendu d'une expérience ». *Iles d'Imesli, Volume 4, Numéro 1*, pp. 117-123.
- Salhi, M.-A. (2017). *Asegzawal amezzyan n tsekla - Petit dictionnaire de littérature*. Tizi-Ouzou : L'Odyssée.

Tijenṭad

Tizegza/

żr. : żer (voir ; cf.)

sb. : asebter (page ; p.)

JM : Tajeṛrumt n tmaziyt n Mouloud Mammeri

MMT : Amawal n tmaziyt tatart n Mouloud Mammeri

MSB : Amawal n tesnilest n Abdelaziz Berkaï

MJBZ : Amawal n tjerrumt n Abdallah Boumalk d Kamal Naït-Zerrad

SMSS : Asegzawal amezzyan n tsekla n Mohand Akli Salhi

MSSM : Amawal n tesnalmutd d tussniwin n umeslay n Mohand Mahrizi

SMSIW : Asegzawal amezzyan n tesnilest n Azedine Idir, Mehdi Yahiaoui

d Nacer Mehdi

Amawal n yirman uzzigen n umagrad-nney : tamaziyt-tafransist-tacrabt

القواعد النظرية : Addayen n tezri : Fondements théoriques

تخطيط مصطلحي : Aseggem asnirman : Aménagement terminologique

التهيئة اللغوية : Aseggem utlayan : Aménagement linguistique

تردد : Asnagar : Fréquence

لفظة جديدة : Awalnut : Néologisme

مصطلح : Irem : Terme

لفظة موضوعية جديدة : Iremnut : Néonyme

ميدان فرعى : Tadyult : Sous-domaine

ميدان : Tayult : Domaine

اختصاص : Tayult tuzzigt : Domaine spécifique

معجمية إحصائية : Taktamawalt : Lexicométrie

تعریضیۃ بُنیۃ : Talyiwin timwennatin : Formes périphrastiques

بنیۃ مركبة : Talyiwin tinudas : Formes synthagmatiques

نظرة دولية : Tamuyli tagraylant : visée internationale

أساليب التطبيق : Tarrayin n usnas : Méthodes d'application

علم المصطلحات : Tasniremt : Terminologie

الترجمة الاصطلاحية : Tasniremt n usuqqel : Terminologie traductionnelle

بحث مصطلحي موضوعي : Tasniremt tasnetlant : Terminologie thématique

التوسيع النظري : Tasnulfawalt : Néologie

توليد المصطلحات : Tasnulfiremt : Néonymie

التواء : Tawila : Tournure

التواصل العلمي : Taywalt tussnant : Communication scientifique

تعديدية الاختصاصات : Udem agtayulan : Pluridisciplinarité

مركب مصطلحي : Udus asnirman : Syntagme terminologique

Agzul

Deg umagrad-a, newwi-d awal yef tesniremt tuzzigt n yisental n yikayaden n lbak n tamaziyt i yettwaseeddan seg 2008 yer 2021 di Lezzayer, s userwes gar yisental n teqbaylit d wid n tcawit. Deg uhric n tezri, newwi-d awal yef tesniremt d yiyerbazen-is, imi tazrawt-nney teqqen yer tayult-a n tussna. Sakin, neglem-d tisnirmin tisnetlanin i ilan assay d uselmed n tutlayt tamaziyt. Ssin yur-s, deg uhric n usnas, newwet ad d-nekkes acali asnirman i yellan gar usentel n teqbaylit d win n tcawit. Dya, aya d ayen ara ay-yeggen ad d-nessuffey s ttawil n yikayaden n lbak kra n yirman i yezzan deg uselmed n tmaziyt. Ger taggara, nemmeslay-d yef wassay i yellan gar yirman n tesnirmin tisnetlanin – ney imawalen uzzigen – i d-yeffyen s wallalen n usizreg d yirman i yettuseqdacen deg yikayaden n lbak n tmaziyt akken ad nzer ansi i d-kkan.

Awalen-tisura

Tasniremt, uzu asnirman, akayad n lbak, taqbaylit, tacawit.

مستخلص

موضوع هذا المقال هو دراسة المصطلحات الخاصة المستعملة في مواضيع امتحانات البكالوريا الجزائرية من 2008 إلى 2021 لمادة اللغة الأمازيغية، مع الأخذ في الاعتبار كل من مواضيع القبائلي والشاوية. الهدف من هذه الدراسة ذو شقين: التعرف على بعض المصطلحات المتخصصة المنفرسة في تدريس الأمازيغية من خلال امتحانات البكالوريا ودراسة مشكلة التغير المصطلحي في اللغة الأمازيغية من خلال مقارنة المصطلحات المستخدمة في مواضيع القبائلي وال Shawia . ونتيجة لذلك، حاولنا الربط بين مصطلحات المعاجم المتخصصة التي سبق نشرها، والتي لها علاقة بمفردات التعليم، والمصطلحات المستخدمة في امتحانات البكالوريا للإثبات «بنوتهم». لكن قبل ذلك، حاولنا تقديم تذكير نظري موجز لأسس علم المصطلحات، وهو علم جديد نسبياً، تقع فيه هذه الدراسة.

كلمات مفتاحية

علم المصطلحات، الانغراس المصطلحي، موضوع البكالوريا، القبائلي، الشاوية

Résumé

L'objet du présent article est l'étude de la terminologie spécialisée utilisée dans les épreuves de la langue amazighe du baccalauréat algérien de 2008 à 2021, en tenant compte des sujets dans deux variétés de cette langue : le kabyle et le chaouia. L'objectif est double : connaître une partie de la terminologie spécialisée implantée dans l'enseignement de tamazight à travers les épreuves du bac ; et étudier le problème de la variation concernant l'usage

de la terminologie spécialisée en tamazight en comparant les terminologies utilisées dans les sujets du kabyle et du chaouia. Nous avons, de ce fait, essayé de faire le lien entre les terminologies spécialisées déjà publiées, décrites auparavant et ayant un rapport avec le vocabulaire de l'enseignement, et celle utilisée dans les épreuves du bac pour tenter d'en établir la "filiation". Mais avant cela, nous avons tenté un bref exposé sur la terminologie, une discipline scientifique relativement nouvelle, dans laquelle s'inscrit notre étude.

Mots-clés

Terminologie, implantation terminologique, épreuve du bac, kabyle, chaouia

Abstract

The object of this article is the study of the specialized terminology used in the exams of the Amazigh language of the Algerian baccalaureate from 2008 until 2021, taking into account subjects in two varieties of this language: Kabyle and Chaouia. The objective is twofold: to know some of the specialized terminology established in the teaching of Tamazight through the baccalaureate exams; and study the problem of variation in the use of specialized terminology in Tamazight by comparing the terminologies used in Kabyle and Chaouia subjects. We have therefore tried to make the link between the specialized terminologies already published, described previously and having a relationship with the vocabulary of teaching, and that used in the baccalaureate exams to try to establish the « filiation » of it. Nevertheless, before that, we have attempted a brief presentation of terminology, a relatively new scientific discipline, in which our study falls.

Keywords

Terminology, terminological implantation, baccalaureate exam, Kabyle, Chaouia